

BONERIANO®

Un hende ta logra
loke e ta kere
aden.

EDITOR:
Bonaire Communication Services N.V.

Djárason 22 mart 2023

Preis: \$1.00

PROTESTA KONTRA DETENSHON THEODORA

Empleadonan di Van den Tweel ku mea spesial



Tur aña riba 21 di mart gran parti di mundu ta selebrá Dia Mundial di Down Syndrom. Esaki pa medio di bisti meanan di koló briante ku no ta kombiná. Tema di e aña aki ta; 'Ku Nos, No Pa Nos'. Na Boneiru tambe basta ta e skol i estableimentunan ku a pone atenshon riba e dia aki. Riba foto personal di supermerkadu Van Den Tweel ku nan 'happy socks'.

MANTENE BO
VEHIKULO OF
EKIPO DEN
KONDISHON
KU PIESANAN
KUMPRÁ NA NAPA



xerox™



OBERSI
ELECTRONICS
BONAIRE

CHANGAN AUTO



CS15

f /dabboussimotors





Ku onda pena direktiva di skol nan katólíko

"Birgen Maria Onderwijs en Kinderopvang"

ta partisipá fayasimentu di

sr. Stanley Crecensio Josepha

tata di sra. Roslyn Josepha, dosente na SBMO

Akto di entiero ta tuma lugá djaweps 23 mart saliendo for di Iglesia Atventista na Antriol pa santana 'Nos Sosiegu' na Playa.

Nos ta deseá famia hopi forsa pa ku e perdida sensibel aki.

Consuelo Memorial

Kaya Maria C. Hellmund-Boom 11 • Bonaire • CN
T/F: (+599) 717 3243 (24h) • info@consuelomemorial.com •

Juan 5:28 "No straña boso di esaki, pasobra e ora lo yega den kual tur ku ta den graf lo tende su bos".

Nos ta partisipá fayasimentu di

Stanley Crecensio Josepha

mihó konosí komo "kid"
èks-trahadó di **Cargill Bonaire**
* 19-04-1945 †19-03-2023



Na nòmber di su señora:

Hendrica Josepha-de Palm

Su yunan:

Roslyn Josepha

Lord Josepha

Su nietu:

Denzel Dortalina

Yu sin doló:

Richard Dortalina

Su rumannan:

Marvis i Lesley Jonis i yunan

Hensley Josepha i Eladia Engelhardt i yu

Erick i Marjorie Josepha i yunan

Amarilis Josepha i yunan

Russell Josepha i yunan

Otmar i Moraima Josepha i yu

Loretha Josepha i yunan

Demas subbrino(a)nan:

Sherrell Fidanque i rumannan

Carine Graanoogst i rumannan

Michael Josepha i rumannan

su primu- i primanan, suá- i kuñanan, amigu- i amiganan, bisifa-, ihá- i tur konosinan.

Su mihó amigunan:

Gaby Felix, Amado Felix, Chaleko Martis

Na nòmber di:

Iglesia Atventista di shete dia Nikiboko/Antriol.

Un danki speshal na: Thuiszorg Mariadal, ZW-groep, Dòkterman di Klínika Tera Kòrá, Fysio di Bario, Dr. Heesbeen, Oncologieteam, zuster- i brudernan di Fundashon Mariadal i Paso Caribe.

Demas famia:

Josepha, Mambre, de Palm, Dortalina, Fidanque, Martina, Jonis, Graanoogst, Ramazan, Engehardt, Keller, Martis, Bokshoven, Windster, Carmelia, Cristina, Da Costa Gomez, Mercera, Wang, Polonius, Christiaan, Baptist, Felix, Brunken, Reimilia, Manuel i Zimmerman.

Si den nos tristesa nos por a lubidá algun famia nos ta pidi nos diskulpa.

Akto di entiero ta tuma lugá djaweps 23 di mart.

Ta risibi kondolensia na Iglesia Atventista na Antriol di 1'or pa 3'or atardi sigi pa sirbishi.

Despues ta hiba nos kerido defuntu na su último lugá di sosiegu den santana 'Nos Sosiegu' na Playa.

Despues di entiero NO por risibí bishita di kondolensia na kas.

A drecha situashon na waf

Despues ku BONERIANO a eksponé e situashon lamentabel na Waf Fransisco (Chico) Marcelina algun tempu pasá, por ripará ku a sera e buraku ku tabatin na entrada di e waf. Bon trabou. Pero pakiko mester a warda asina tantu pa pone man na obra?



DANKI

#HUNTU

UNÍ NOS TA MAS FUERTE

TOGETHER WE ARE STRONGER • TOGHET

PROTESTA KONTRA DETENSHON THEODORA

KRALENDIJK- Ta formando un grupo di persona desidido pa bai protestá kontra detenshon di Emiliano T. (32). E ta enkarselá den kuadro di aresto preventivo for di 25 di desèmber 2022.

For di inisio di e kaso aki a kuestioná e proseder di outoridat. Ta difísil pa vários persona komprondé ku ainda T. ta enkarselá. Riba medio sosial basta hende ta komentá tokante e situashon aki. Nan ta konsiderá henter e proseder komo in-hustu. Awor tin indikashon fuerte ku un grupo basta

yegá na T. ta organisando un protesta. “No por otro. Ta nos mes mester sali p’e. No por konfia Hustisia”, nos fuente ta bisa.

Ta trata aki di e aksidente di tráfiiko fatal ku a tuma lugá riba Pasku di Nasementu di aña pasá. T. tabata manehá un outo ku a kousa morto di un siklista hulandes oropeo.

Ministerio Públiko (OM) ta akusá T. di culpabilidad di un morto den tráfiiko. Tambe ku el a kore outo ku velocidat hopi haltu i kore bou di influensia di alkohòl. T. a hasi tèst di

blas ku a detektá 845 UGL di alkohòl.

Na Boneiru básikamente ta un fenómeno ku e sospechoso den kasonan di aksidente di tráfiiko ainda ta será. E periodo di aresto preventivo den kasonan asina ta basta limitá. No opstante kiko e abogadonan di T. trese dilanti, korte ta para ‘riba ku e aksidente a shòk órden hurídiko pues e tin ku keda será te ku tratamentu di su kaso.

BONERIANO a tuma kontakto ku abogado mr. Marga van Lieshout pa un splikashon di kiko ta referí ku shòk órden hurídiko.

“Esaki básikamente ta nifiká ku si laga e persona den libertat pa warda tratamentu di su kaso, ta ferwagt intrankilidad den komunidad. Esaki ta pasa den kasonan ku a sakudí komunidad”, el a splika. Aparentemente korte no ta tene kuenta ku e ponensia aki ta konta pa ámbos banda. Pasombra ironia ta ku e intrankilidad ku nan ta teme, por bai surgi awor pa motibu ku hustamente tin T. enkarselá. Reforsando asina e sentimentu ku hustisia ta midi ku dos midí.

Pa van Lieshout mester

ta kouteloso i no kai den e diskushon di ‘pasombra ta makamba òf ta yu di tera’. “Pero si mi por imaginá mi si kompará ku otro kaso ta mira ku T. ta wòrdu trata otro”, el a agregá. E abogado a enfatisá ku el a opta den korte ku por laga T. den libertat poniendo algun kondishon. Hasiendo esaki lo a demonstrá ku Korte ta tene kuenta ku komunidad i alabes e interes di T. Pero Korte no a bai di akuerdo.

“Den mi opinion no ta korekto ku Emiliano T. ainda ta den aresto preventivo, no opstante loke a pasa”, e abogado ta bisa desidido.

BONERIANO a tuma

kontakto ku Ministerio Públiko pa un reakshon. OM ta bisa ku den un estado di derecho manera nos ta biba den dje tur hende tin derecho pa manifestá. Basta e manifestashon bai di un manera pasífiko i no ta stroba órden públiko.

Pa ku e kaso spesífiko aki tokante Emiliano T., OM ta masha kòrtiku. “E hues komisario a tuma un desishon pa no skòrs e aresto preventivo di e sospechoso. E hues tei pa ta imparisial i su desishonnan mester keda respetá.”

Korte den Promé Instansia lo trata e kaso aki riba 13 di aprel próksimo.

Na parokia San Luis Beltran

Preparashon Promé Santa Komunion

KRALENDIJK- Pa algun siman kaba muchanan ta risibí lès di risibimentu den Parokia San Luis Beltran. Esaki ta bou di enkargo di mester Lendon Leito. Na un manera inovativo i kreati-

vo e muchanan ta konosé un tiki mas ku Kristu-Hesus. E selebrashon ta tuma lugá e aña aki riba 18 di mei.

Riba e foto por mira algun di e muchanan ku ta preparando pa risibí.



22 di Mart 2023

“... Tata a hasi Yu tambe Fuente di bida.” (cf Huan 5,26)

Dia’den dia’fó nos ta imbertí tempu pa trata di strukturá nos bida, pa realisá un karera profesional ambisioso, atkerí biennan material i alkansá otro kaprichonan humano. Nos ta trata di animá nos mes adoptando filosofianan humano liberal i hedonista, satisfasiendo nos deseonan hopi biaha egoista i desareglá, pa duna sentido na bida. Pa despues realisá, ku tur tempu nos a krea un bida monótono i bashí, sin sentido real.

Duna bida sentido! Kuminsá awe! Rekurí na e úniko i berdadero Fuente di bida i deskubrí e rikesa spiritual ku Hesus ta ofresé. Eksperensia e poder spiritual ku ta manifestá den djE i pa medio di djE, pasobra “... Tata a hasi Yu tambe Fuente di bida.” (cf Huan 5,26)

Danki Señor “... pa ta serka esnan ku ta invoká Bo...”

1L Is 49,8-15.12; Salmo 145,8-9.13-14.17-18; Ev Huan 5,17-30

005999-522-4056 Un Snehil Pan unsnehilpan

Porta BonLab riba un skref

KRALENDIJK – E suerte di BonLab ainda definitivamente no ta seyá. E último aña e ministerio di VWS, via di su departamento di kuido i hubentut Karibe Hulandes, ZJCN, a konsentrá riba seramentu di BonLab. Dor di konsentrá e kuido di laboratorio na Mariadal, pa spar riba e kostonan. Na diferente okashon Kolegio Ehekutivo i Konseho Insular, a hasi nan opheshonnan públiko, pero e sekre-



Minister Maarten Oijen.

tario di estado responsabel, Maarten Oijen, a nenga un kombersashon. ZJCN a disidí pa finalisá e kontrakt ku BonLab entrante promé di yüni.

Protesta konstante di

parti Entidat Públiko Boneiru, a kondusí ku a disidí pa instituí un komishon konhunto, ku mester trese e futuro di e kuido di laboratorio na klaridat.

Den reakshon riba preguntanan di Tweede Kamer, djamars van Ooijen a kontestá dependé di e afspraaknan ku e lo hasi ku Kolegio Ehekutivo, promé ku yüni e lo tuma un desishon tokante kontinuashon di kontrakt di ZJCN ku BonLab i pa kuantu tempu esaki lo ta.

POLÍTICA

Resultado elekshon 2023:

1Union pa Pueblo deseepshonante.

KRALENDIJK- Por konklui ku e kantidat di voto ku Aljano Emerenciana a haña den elekshon di Konseho Insular, ta deseepshonante. Partido Político 1Union pa Pueblo no a yega na un asiento ku un total di 268 vota. Emerenciana komo lider a risibí 86 voto. Janga, ku a profilá komo number 2 a risibí 32

voto.

Na elekshon di 2019 e partido a logra un kantidat di 367 voto pues nan a bai atras ku kasi 100 voto.

E kampaña político di e partido no tabata dirigí riba puntonan spesifiku. Durante debatenan nan a reakshoná generalmente riba ponensianan. Pues nan no tabata konsiso i spesi-

fiko riba algun ponensia. Nan por a nombra e doló di pueblo pero no a presentá konkreto kon nan lo ke aliviá esaki. Den e periodo benidero partidonan ta evaluá e kampaña ku nan a hiba i e resultado di elekshon. Aljano Emerenciana sigur mester saka konklushon a base di e resultado, i bai pa un cambio.



Norbert Tadema sorpresa di M21

KRALENDIJK- Mester konsiderá Norbert Tadema e sorpresa di M21. E hulandes oropeo aki, kandidato number 9 riba lista di M21 a saka 93 voto. E ta esun ku mas voto despues di e lider Daisy Coffie. Ta remarkabel ku Bernard Landwier komo number 2 a logra solamente 30 voto.

Carlos Lopez Nartera a haña 45 voto. Esther Zim-

merman a logra ku 56 hende a depositá konfiansa den dje.

M21 ta un partido nobo, pues por mira resultado di e elekshon komo un logro pa e partido. Nan a saka 1 asiento.

Tadema a profilá basta fuerte pa bienestar di bestia. Asta promé ku kampaña político el a entregá un keho oficial kontra po-

lis. E ta haña ku polis no ta apto pa determiná si mester eliminá un kachó òf no. Mirando ku nunca nan a risibí preparashon pa rekonosé un kachó agresivo.

Por konklui ku tur e akshonnan aki tabatin resultado mirando e kantidat di voto ku el a haña. No por deskartá ku mayoria di su votadónan probablemente ta hulandes oropeo.



Tim informashon M21

KRALENDIJK -- M21 ta sigui duna espasio i ta respetá resultado di elekshon. Mirando e petishonnan ku M21 ta risibí pa kombersa-

shon di parti di otro partidonan, òf pa informashon di parti di prensa, M21 a enkargá un delegashon ku e trabou aki.

M21 su delegashon di informashon ta konsistí di Alberseeto Cecilia, presidente, Bernard Landwier, Carlos Lopez-Natera, An-

thony Weber, bosero, Maira Frans i Evo Cicilia.

Pa kombersashon ku e delegashon por tuma kontakto ku Alberseeto Cecilia

na telefòn 795-0816.

Pa informashon na prensa, por tuma kontakto ku e bosero Anthony Weber na telefòn 770-3970.



Segun akusado Peter Y.:

“Ta trapa mi derecho humano”

KRALENDIJK- Korte den Promé Instansia a atendé un kaso basta pekuliar.

Ta trata aki di e kaso penal kontra Peter Y. Ministerio Públiko ta akusá di a hasi denuncia falsu, ladronisia i estafa. E akusado a presentá den sala di korte sin un abogado.

Mester remarká ku Y. ta un hòmer konosí pa hustisia. Na diferente okashon BONERIANO a kubri kasonan kontra dje. E mes a splika ku den 10 aña a atendé 60 kaso di dje. Semper el a hiba un bataya feros kontra e sistema hurídiko,

indikando ku ta trapa su derecho humano. Den e kaso aki tampoko ta diferente.

Y. a splika korte ku básicamente no tin abogado na Boneiru ku por òf ke representá. “Mi no ta bai ku van Lieshout pa motibu di konflikto di interes. Nicolaas a bisa mi ku ta Winkel ta representá mi, ora m’a bai serka Winkel el a bisa mi ku esaki no ta kuadra. Nicolaas a yega di bisa mi un bia ku korte a menas’é pa no tuma mi kasonan. A bis’e si e hasi esaki el o no tin futuro den lei”, el a bisa.

Segun Y. tin un konspirashon grandi kontra dje.

“Mi por posponé e kaso i duna bo mas tempu pa buska un abogado. Pero mi ke e seguransa ku bo ta logra”, hues a bisa.

“Bo ta konsiente ku mi a risibí mi dagfar 7 di mart?”, Y. a kuestioná.

“Lei ta bisa ku un akusado mester risibí su dagfar 7 dia promé ku e huisio. Pues a kumpli ku esei”, hues ta reakshoná. Konsekuentemente Y. a reklamá ku tur kos den su dosié i dagfar ta na Hulandes i ku e tin derechi riba tradukshon. Tambe

el a deklará ku a ‘hack’ su kòmputer i kita algun fail importante.

Fiskal mesora a reakshoná. “Bo a bisa esei i mi apidi bo trese e prueba. Ainda bo no a trese niun prueba.”

Dado momentu a surgi un diskushon basta eksteso di parti Y. deklarando ku e ta bai Korte Oropeo pa Derecho Humano.

Mester remarká ku e akusado aki ta un persona basta notorio pa korte. Asta e tin prohibishon pa drenta den edifisio di korte. Tambe el a deklará ku Rosales

komo hefe di polis i fiskal mayó a prohibí agentenan polisial pa tuma kualke denuncia di dje.

Interesante tabata e echo ku Y. a eksigí e prosèsverbal di su huisio pero ku e karakterístikanan di e dokumentu. El a tilda un griffier anterior di a falsifiká un prosèsverbal. “Ta ami ta fiha contenido di e prosèsverbal. Bo ta haña loke tur hende ta haña”, hues a bisa strèn. Na final Korte den Promé Instansia a posponé e kaso kontra Peter Y. Lo trata e kaso den su contenido riba 7 di yüni próximo.

Akusadonan a sali di bon

KRALENDIJK- Por konklui ku 2 akusado a sali basta di bon na momentu ku Korte den Promé Instansia a kondená nan. Djaluna 20 di mart Korte a husga e hòmernan George B. i Rigchendly J., ámbos nasé na Kòrsou i mesora a duna un sentensia. Ministerio Públiko (OM) a akusá nan di maltrato severo. Hues a kondená ámbos hòmer na un kastigu di prizòn di 5 luna di kua 1 luna kondishonal, ku un periodo di prueba di 3 aña. B. a haña tambe supervishon di Reclasseing, tratamentu na Mental Health Caribbeaan (MHC) i treinen pa regulá agresividat.

Abogado mr. van Lieshout a defendé B. i abogado mr. Nicolaas a hiba defensa di J.

Fiskal mr. Agelink a representá OM. Ámbos hòmer ta enkarselá den quadro di aresto preventivo pues wardadónan di prezu a eskoltá nan pa sala di korte.

E delito

Ta trata aki di un akcidente di outo ku a tuma lugá entre e sospechoso B. i e hòmer Brian A. Nan a disidí di regla esaki sin involukrá polis i a palabrá ku nan lo topa otro e siguiente dia. Brian no a presentá, no opstante vários yamada di e sospechoso B. Dado mo-

mentu e tata di Brian a tuma kontakto ku B. i a palabrá pa topa otro riba Kaya Korona. Aki e situashon a sali kompletamente for di man i a kuminsá ku bringamentu. Brian a yega ku un skrudrai i a hinka e sospechoso J. Segun e dosié penal B. a dal Brian ku un blòki di betòn riba su kabes. Hues a haña ku e akusadonan a papia habrí i onesto tokante e situashon. “Ta un bringamentu ku a sali kompletamente for di man. Boso ta muestra ku bo ta lamentá e suseso”, e hues a bisa.

E kondena di e hòmernan ta nifiká ku mesun dia nan ta hòmer liber. Nan mester a bolbe Instituto

Hudisial Hulanda Kari-bense (JICN) pa kumpli ku e fromalidatnan pa rekobrá libertat. E wardadónan di

prezu a bai ku e hòmernan sin bui nan, mirando ku praktikamente nan ta hòmernan liber.




Na 2022

4% Mas pasahero aéreo na Hulanda Karibense

KRALENDIJK--Na 2022 mas ku 475 mil pasahero a bula pa i for di e aeropuertonan di Boneiru, Saba i Sint Eustatius. Esaki ta kasi 64 porshento mas ku na 2021 i 4 porshento

mas ku na 2019. E kantidat di avion ku a bula di i pa e aeropuertonan aki tabata kasi 14 porshento mas haltu ku na 2021. Esaki CBS ta informá a base di sifranan nobo.




Den yuli i desèmber 2022 mayoria di pasahero a bula di i pa e tres aeropuertonan di Hulanda Karibense 45 mil den ámbos luna. Djasabra 19 di febrüari tabata e dia mas druk. E dia ei 2,5 mil pasahero a pasa via e terminalnan di Flamingo Airport na Boneiru, F.D. Roosevelt Airport na Sint Eustatius òf Juancho E. Yrausquin Airport na Saba.

for di Flamingo Airport na Boneiru; esaki ta 91 porshento di tur pasahero na Hulanda Karibense. Pa e aeropuertonan di Sint Eustatius i Saba tabata respektivamente 5 i 4 porshento. Pista di aterisahe di Flamingo Airport na Boneiru tin tres kilometer di largura, i esaki ta permití avionnan mas grandi aterisá. E pistanan di aterisahe na Saba i Sint Eustatius ta mas kòrtiku, pues pa esaki ta bula ku avionnan mas chikí riba e islanan aki.

Pa i for Boneiru

Na 2022 kasi 432 mil pasahero a baha na òf a sali



Kantidat di pasahero aéreo na Boneiru

Den komparashon ku 2019 e aña pre-corona, tabatin 4 porshento mas pasahero na 2022 ku a biaha for di i pa e islanan di Hulanda Karibense. Tur e pasaheronan ékstra aki a biaha for di i pa Boneiru: for di 384 mi pasahero na 2019 pa 432 mi na 2022, un oumento di mas ku 12 porshento. E kantidat di bula di i pa Boneiru tabata hopi mas abou

ku e nivelnan di 2019.

Saba

Na aeropuertonan di Sint Eustatius i Saba huntu a ehikutá mas ku 8.6 mil buelo na 2022. Esaki tabata 44 porshento di tur e buelonan di i pa Hulanda Karibense i 16.4 porshento mas ku na 2021. Juancho E. Yrausquin Airport na Saba tabata e úniko di e tres aeropuertonan na Hulanda Karibense unda e kantidat

di buelo na 2022 a subi kompará ku na 2019.

For di Saba i Sint Eustatius mayoria di buelo ta sali i yega for di Sint Maarten tantu na 2019 komo na 2022, mayoria di buelo di i pa Boneiru tabata for di Kòrsou i Amsterdam; respektivamente 84 porshento i 78 porshento di e bue-


lonan. Mayoria di buelo for di e aeropuertonan di Saba i Sint Eustatius huntu ta bai i bini for di i pa Sint Maarten, na 2022 esaki tabata 83%.

Kuater aeropuerto di Hulanda

Na Flamingo Airport na Boneiru a ehikutá mas

ku 11.2 mil buelo na 2022. Boneiru ta na di kuater lugá riba e aeropuertonan Hulandes despues di Amsterdam Airport Schiphol, Eindhoven Airport i Rotterdam The Hague Airport. Esaki ta konta tambe pa e kantidat di pasahero transportá.

Moveshonnan aéreo di i pa Boneiru, St Eustatius i Saba



E bia aki entrada prinsipal

Supermarkado Warehouse den remodelashon

KRALENDIJK— Despues di a remodelá praktikamente henter e supermarkado, a toka turno na entrada prinsipal. Supermarkado Warehouse a inisiá e proyekto di remodelashon di nan entrada prinsipal. Esaki ta enserá ku tanten ku

manera un lobi,” asina un representante di e supermarkado a splika BONERIANO. E proseso ta bai dura entre 3 pa 4 luna. Entrante djaweps 23 di mart klientenan por kuminsá hasi uzo di e entrada temporal.

“Nos ta bai tin un entrada nobo kual ta bai bira un área será parti dilanti kaminda ta e entrada prinsipal awor aki. Por bisa

manera un lobi,” asina un representante di e supermarkado a splika BONERIANO. E proseso ta bai dura entre 3 pa 4 luna. Entrante djaweps 23 di mart klientenan por kuminsá hasi uzo di e entrada temporal.



Segun Nolly Oleana:

No por kosechá sin nutri tera

KRALENDIJK — Pa un tera produsí e mes- ter haña kuminda. Esei ta un parti ku hopi ta lubidá ariba. Asina e agrikultor i eks dosente di skol Nolly Oleana a duna di konosé. Nolly tabata invitado den programa AKTUALIDAT. E ta konosí di ta hopi aktivo riba tereno di agrikultura.

Anteriormente Oleana a relatá riba retonan ku agrikultornan ta enfrentá. Un di nan ta tera. Boneiru su tera no ta fértil pues mester trata esaki.

Kompòst

E ta sigui splika ku kompòst ta un di e komponentenan pa yuda fertilisá e tera. Tin diferente tipo di kòmpòst. Esun ku ta bai uza na Boneiru ta esun unda lo uza sushi di animal meskla ku elementonan orgániko. “Ta bai uza sushi di tur bestia ku eksepshon di kachó, pushi i porko. Motibu di esaki ta ku e animalnan aki tin un otro tipo di zür di stoma kompará ku otro animalnan ku no ta bon pa mata.

Oleana: ”E kunukero mas aleu ta añadí ku e tipo di zür den stoma di e animalnan aki ta stroba e proseso di bakteria den tera.

Un punto ku e ta enfoká riba dje ta pa no uza e sushi di animalnan manera baka, galiña i kabritu fresku. Esaki ta fatal pa e mata.”

E sushi fresku aki ta produsí tres tipo di gas ku e mata su raisnan no por wanta i p’esei e ta muri. Na momentu ku trat’è i kambi’è pa kompòst, e ora sí e ta apto pa mata, debí ku e ta riku na komponente i vitamina pa e mata.

E proseso no a kaba einan. Despues ku a trata e kòmpost, ta lag’e para algun siman. Esaki despues ku a bòltu e meskla pa entre otro tur gas ku tabatin aden sali i ku e 20% di oksígeno ku e mester kontené ta distribuí ekivalente. Un total di 16 siman ta laga e kòmpòst para i despues e ta kla pa uzo.

Kuminda pa tera

E agrikultor mas aleu ta para ketu na e echo ku hopi biá ta reklamá kosecha no ta manera ántes. Grandinan ántes tabata kosechá palu i frutanan grandi.

Segun Oleana loke hopi no ta para ketu n’e ta ku mester duna tera kuminda pa e por sigui produsí. Ne-

tamente esaki ta e funshon di e kompòst. Na momentu ku bru’e den tera, e ta nutri i drecha e tera. Si e mata tin un tera saludabel, e tambe ta krese salú.

No ta un sekreto ku Nolly tin un amor inmenso pa agrikultura. Esaki a pone ku el a lanta su kompania Agritera. Riba su so Agritera no por funshoná. Den e kuadro aki a sinta na mesa ku LVV. LVV ta hür pida tereno pa esnan interesá por planta.

Selibon

Un otro partner di Agritera ta Selibon. ”Na Selibon ta yega tur e material bèrdè ku mester pa traha e kompòst. Pues tabata opvio ku mester a kombersá ku nan tambe pa yega na akuerdo.” Tur loke Selibon kolektá na sushi di bestia ta bai riba tereno di LVV huntu ku e sushi bèrdè. Agritera ta sòru pa un kompania mula tur loke ta blachi i mata i ta agregá esaki na e kompòst. Na su turno LVV ta kumpra e kompòst na un preis redusí i ta uza esaki pa fortalese su tera.

Aktualmente ta importante 6 kòntainer di 20 pia ku kompòst. Segun Oleana

ta un lástima, siendo ku nos mes por produsí esaki. Intenshon final ta pa sostené agrikultornan lokal di manera ku Boneiru por produsí su mes produktonan. Esaki por, basta haña guia, i sosten di gobièrnunan. E idea finalmente ta pa unabes produkshon subi, ún bia pa luna bini un marshe

unda tur agrikultor por bende nan produkto.

“Si mitar di agrikultornan riba nos isla, kumpra i uza e kompòst lokal i subinan produkshon, aki poko tempu no mester ni importá esaki mas. E kompòst ta di mihó kalidat i nos sa kiko tin den dje.”



OPROEP

Bij het Gerecht in Eerste Aanleg van Bonaire, Sint Eustatius en Saba, zittingsplaats Bonaire, is door Johans Francisco Thielman, wonende te Bonaire, een verzoek ingediend tot toekenning in eigendom van de langdurig onverdeeld gebleven boedel bestaande uit het perceel te

NIKIBOKO (19.820 m2)
te Bonaire

kadastraal bekend afdeling 4, sectie G, nummer 534, groot 19.820 m2 (kunuku), welk perceel volgens de schriftelijke inzage van het Kadaster ten name staat van 'Eigenaar Onbekend', met als opmerking 'Volgens domein in kaart gebrachte gronden staat de naam van Julien Goeloe, overleden, per adres Hendrika Cimona Thielman (...),

zulks op grond van artikel 3:200a en verder van het Burgerlijk Wetboek BES.

Mogelijk is dat Julien Goeloe bij de afdeling burgerzaken van het OLB staat vermeld als Julien Golo, geboren op Curaçao in 1834 en overleden op Bonaire op 12 maart 1899, gehuwd met Maria Elisabeth Augustien (of Augustina of Agostien of Hoestien), geboren op 8 augustus 1843 en overleden op 14 september 1907. Volgens de gezinssamenstelling van burgerzaken hebben zij één kind gekregen: Cornelia Gustina Golo, geboren op Bonaire op 19 maart 1876 en overleden op 17 september 1952, gehuwd met Johannes Thielman, geboren op Bonaire op 4 januari 1874 en overleden op Bonaire op 16 mei 1942. Andere kinderen van Maria Elisabeth Augustien waren volgens de gezinssamenstelling van burgerzaken: Henrij, geboren op Bonaire op 16 juli 1865, Eloisa Barbolina, geboren op Bonaire op 4 december 1867, Henriette Lucaria, geboren op Bonaire op 18 oktober 1870, Elias, geboren op Bonaire op 23 december 1878.

Een stamboom met tot nu toe bekende verdere afstammelingen is te vinden via

www.gemhofvanjustitie.org/uitspraken/onverdeelde-boedels

Geslachtsnamen van mogelijk deelgenoten zijn naast Goeloe/Golo, Augustien/Augustina/Agostien/Hoestien en Thielman onder meer: Nucatia, Martijn, Raphaela, Winklaar, Anthony, Mezquita Muñoz, Landzaat.

Belanghebbenden worden opgeroepen om op de rolzitting van woensdag 28 juni 2023 om 9.00 uur te verschijnen in het gerechtshuis te Bonaire (Fort Oranje, Plasa Reina Wilhelmina) en kunnen voorafgaand of tijdens die rolzitting een bij de griffie te verkrijgen aanmeldformulier, desgewenst voorzien van een verweerschrift, indienen bij de griffie van het gerecht onder vermelding van **BON202000482**.

Telefonische inlichtingen kunnen worden ingewonnen bij griffier (**tel: + 599 717 8172**).

De in deze zaak door het gerecht gegeven en te geven beschikkingen zullen worden gepubliceerd op www.gemhofvanjustitie.org/uitspraken/onverdeelde-boedels

Workshop tokante resilensia

KRALENDIJK – Dia 23 di mart Renata Domacassé, GZ-Sikólogo, ta bai duna un workshop tokante resilensia. Esaki ta tuma lugá na Avanti An-



tríol, di 7’or pa mitar di nuebe di anochi.

Resilensia ta e abilidad pa atendé ku asuntunan ku ta sosodé den bida. Nos tur ta pasa pèrdida, kambio i slanan di bida, loke ta kousa strès, tristesa, miedu i doló.

Meskos ku nos ta kuida nos salú físiko, nos mester kuida nos salú mental. Ora e salú mental ta fuerte, por dil mihó ku e slanan di bida.

Kon por hasi esaki, por tende den e workshop grátis dia 23 di mart na Avanti Antriol.

RIVM: Karnaval no a okashoná eksploshon di Corona

KRALENDIJK -- E aktividatnan di karnaval riba e diferente islanan, no a kondusí na un oumento visibel den e kantidat di kasonan di COVID. Esei RIVM ta informá den su relato di luna di islanan karibense.

Luna pasá e kantidat di resultado di tèst positivo den e área Karibense di Reino Hulandes, a baha konsiderablemente kompará ku e luna anterior, di 216 a bai 89 kaso.

E kantidat di hospitalisashon relatá ku COVID-19, tambe a baha. Na luna di febrüari a hospitalisá na tur 16 pashènt riba tur isla huntu, kontra 27 na luna di yanüari. E sifra di mortalidat relatá na COVID-19 a keda abou tantu na yanüari komo na febrüari, ménos ku sinku.

Kòrsou

Na Kòrsou a hasi menshon na luna di febrüari di ocho resultado di tèst positivo i ménos ku sinku hospitalisashon. Niun persona a muri di e infekshon.

E kantidat di resultado di tèst positivo tabata hopi mas abou ku na luna di yanüari, 45. E kantidat di hospitalisashon nobo relatá ku COVID-19, a baha kompará ku luna di yanüari, ora ainda a hasi menshon di seis kaso.

Den e último siman di febrüari, un riba 100.000 persona a haña un resultado di tèst positivo i e positividat di tèst tabata 0,7 porshento. Ta tèst hopi ménos riba e isla kompará ku den fin di aña.

Aruba

Na Aruba a hasi menshon na luna di febrüari di 61 resultado di tèst positivo i djestres hospitalisashon. A kontá ménos ku sinku kaso di morto relashoná ku COVID-19. Esaki ta kasi mitar di e kantidat ku a menshoná na luna di yanüari, 117.

Den e último siman di febrüari, ocho riba 100.000 habitante a haña un resultado di tèst positivo i e positividat di tèst tabata ocho porshento.

St. Maarten

Na St. Maarten a hasi menshon di ménos ku sinku resultado di tèst positivo i hospitalisashon. Ningun persona a muri di COVID. E kantidat di resultado di tèst positivo, a baha kompará ku luna di yanüari na 14. Na St. Maarten tambe ménos persona a tèst. Na luna di febrüari a hasi 75 tèst, miéntras ku na luna di yanüari e kantidat tabata 180.

Den e penúltimo siman di febrüari, tres di kada 100.000 habitante, a haña un resultado di tèst positivo i e positividat di tèst tabata 7,7 porshento.

Boneiru

Na Boneiru a hasi menshon di djessinku infekshon na luna di febrüari. Riba e isla akí tambe e kasonan ta hopi ménos ku na luna di yanüari, 38. E kantidat di hospitalisashon i morto relashoná ku COVID, ya pa basta tempu ta abou. Na luna di febrüari no a hasi menshon di hospitalisashon nobo òf morto.

Den e último siman di luna di febrüari djesocho riba 100.000 habitante, a haña un resultado di tèst positivo i e positividat di tèst tabata 22 porshento.

St. Eustatius/Saba

Na St. Eustatius no tabatin resultado di tèst positivo na luna di yanüari i

febrüari 2023.

Na Saba a hasi menshon di ménos ku sinku resultado di tèst positivo i na luna di yanüari tambe tabatin ménos ku sinku.

Riba ámbos isla no tabatin menshon di hospitalisashon i morto relashoná ku COVID na 2023.

Mensaje de la Virgen Maria Reina de La Paz desde Medjugorje 25 de FEBRERO de 2023

"Queridos hijos, conviértanse y revístanse de vestiduras penitenciales y de oración personal profunda, y humildemente pidan la paz al Altísimo. En este tiempo de gracia, Satanás quiere seducirlos, pero ustedes, hijitos, miren a mi Hijo y síganlo hacia el Calvario en la renuncia y el ayuno. Estoy con ustedes porque el Altísimo me permite amarlos y conducirlos al gozo del corazón, en la fe que crece en todos los que aman a Dios por encima de todo.

¡Gracias por haber respondido mi llamado!" **02/25**

PIANAN BUNITA!

"Ki bunita riba e serunan ta e pianan di esun ku ta trese bon nobo, ku ta anunsiá pas i ta trese bon nobo di felisidat, ku ta anunsiá salbashon i ku ta bisa Sion: "Bo Dios ta reina!" Isaias 52:7 (BS)

Johanna Veenstra tabata un sekretaria na New York ku a sinti ku Dios tabata yam'e pa bai komo mishonero. E no tabatin pas na su trabou. Finalmente el a respondé na e yamada Divino i a kue kaminda pa Afrika. Einan el a sirbi den e área médiko i di evangelismo.

El a traha den un ambiente di hopi skuridat, yen di idolatria i poligamia i a wanta plaga di insekto i djaka pero no a sinti falta di bolbe bèk su pais. E no a mira hopi fruta di su trabou pero a konfia ku Dios tabata den kontròl. Sin duda el a sinti pas maske e tabata den un lugá straño pasobra e tabata den e sentro di Dios Su boluntad. El a muri na edat di 39 aña i a hasi un gran impakto den hopi bida.

Profeta Isaias a ekspresá ki bunita ta e pianan di esun ku ta trese e bon nobo i ta anunsiá pas, felisidat i salbashon (Isaias 52:7)! Pablo ta bisa: "Kon nan por kere den esun di Kende nan no a tende? I kon nan lo tende sin un predikadó? I kon nan lo prediká si nan no wòrdu mandá?" Romanonan 10:14,15.

Nos mishon ta pa bai proklamá e bon nobo di salbashon na esnan ku no a tende. Johanna a obedesé Dios pa bai hiba e evangelio na Afrika. Si Dios yama bo, lo bo bai? Isaias a bisa: "... At'ami aki! Manda ami!" Isaias 6:8.

I kon nan lo tende sin un predikadó?

Valerie Balootje-Hooi

Produkshon PGM



Programanan di Bonaire.tv

TELBO kanal 70
Flamingo TV kanal 23

Djárason 22 mart 2023

12.00 Herensia:	Guus Gerritsen
13.00 Aki Bonaire:	Trapi Holten
14.00 Herensia:	Hendrica i Stanley Josepha
15.00 BAPA:	Elaisa Noris Pietersz
16.00 Herensia:	Juliana Robertina Wanga-Angela
17.00 Aki Bonaire:	Bishita Fraternal Yuli
18.00 Herensia:	Edmundo Franklin (Eddy) Christiaan
19.00 BAPA:	Tonnie Rossen
20.00 Aktualidat:	Sendion Balentin i Rogen Pineda
21.00 Aki Bonaire:	Desvelo di bustu Broertje Janga
22.00 Herensia:	Jaime i Louisa Emerencia
23.00 BAPA:	Ruthy Vrieswijk-Bergen

Tur mèrdia 12'or ta kuminsá un programashon nobo di 4 ora.
E programashon aki ta ripití pa 24:00.

Unicef ta atvertí

Menasa pa awa di bebe

KRALENDIJK – Awe mundialmente ta selebrá Dia Mundial di Awa di Bebe. Kompará ku na Boneiru, tin hopi pais na mundu kaminda miónes di mucha ta den peliger di menasa di awa di bebe. Unicef, e organisashon di derecho di mucha, awe riba Dia Mundial di Awa di Bebe, ta atvertí pa e menasa akí.

Den dies pais afrikano, 190 mion mucha ta kore peliger dor di diferente sorto di menasa di awa. Pa esaki Unicef ta atvertí den un rapòrt. Mundialmente, segun Unicef, míles di mucha ta muri pa dia dor di awa di bebe kontaminá.

Segun Unicef, kasi un terser parti di e 190 mion

mucha for di e rapòrt, no tin aksesu na awa na kas i dos terser parti no tin fasilidat sanitario. Un kuart di e muchanan, segun e organisashon, mester hasi nan nesidat den aire liber, tres kuart no tin awa i habon na kas pa laba nan man.

E organisashon a investigá e situashon na Benin, Burkina Faso, Kamerun, Tsjaad, Kosta di Ivor, Guinee, Mali, Niger, Nigeria i Somalia.

Seis di e paisnan akí e aña ku a pasa, a haña nan mes konfrontá ku un brote di kólera, un malesa ku ta plama su mes hopi lihé via di awa. I den hopi di e paisnan akí e situashon ta instabil, dor di kua muchanan ainda tin difikultat pa haña

aksesu na awa limpi i fasilidatnan sanitario.

Nesidat básiko

“E pèrdida di bida di un mucha ta shòk grandi pa famia. Pero e doló ta bira aun mas serio sí nos por a evitá e morto, pasobra e ta okashoná dor di falta di nesidatnan básiko ku hopi di nos di mes ta konsiderá, manera awa di bebe limpi, tualèt i habon,” direktor di Unicef Hulanda, Suzanne Laszlo, ta bisa.

Unicef ta atvertí ku e kambio di klima ta sòru solamente mas a e situashon bira mas serio, dor di sekura kresiente òf netamente hopi yobida. E organisashon ta bringa pa akshon urgente, manera pone

fasilidatnan di awa, mas finansiamentu pa klima i hasi e komunidadnan mas stabil kontra klima.

E rapòrt ta publiká na bispera di e konferensia di awa na Estádos Unidos, ku ta organisá pa promé biá

despues di kasi 50 aña.

Hulanda ta organisá e konferensia huntu ku Tadzjikistan.

Awe ta Dia Mundial di Awa. Mundialmente tin dos miar hende sin aksesu na awa limpi na kas.



E tim spesialisá FINEC di KPCN ta atendé

Kriminalidat finansiero ekonómiko ku man duru

KRALENDIJK -- Kriminalidat finansiero ekonómiko ta un problema sosial serio. E ta dañá konfiansa entre siudadano, empresa i gobièrnu. Na 2022 a lanta e tim di Kriminalidat Finansiero Ekonómiko (FINEC) den KPCN pa inisiá e bataya kontra e tipo di kriminalidat akí. Asina tin vários investigashon penal andando tokante entre otro labamentu di plaka, froude i malversashon. Banda di esaki FINEC ta duna sosten aktivo den kasonan di reshèrshi regular di e otro departamentunan di reshèrshi di KPCN.

Tambe FINEC ta desaroyá instrumento di reshèrshi pa análisis di

informashon finansiero. Den kolaborashon ku Polis Hulandes FINEC a desaroyá un instrumento pa analisá transakshon di banko tambe. Den esaki tabatin kolaborashon estrecho ku MCB, RBC i Banco di Caribe. Aworakí ta posibel pa por buska entre un gran kantidat di transakshon bankario, esaki ta kontribuí na investigashon finansiero bon i sólido.

Kriminalidat finansiero mayoria biaha ta tuma lugá skondí. P’esei FINEC tin un punto di bista aktivo i ku enfoke eksterno pa asina yega na investigashonnan nobo. FINEC ta analisá un kantidat di señal sospechoso ku por ehèmpel

banko, notario, konsehoro i abogado a mèldu. Esaki ta kondusí na investigashonnan nobo i un kompreshon mas a fondo di e paisahe di kriminalidat finansiero den Hulanda Karibense.

Kriminalidat finansiero ta manifestá su mes den un kantidat di forma. Ehèmpel di esaki ta tur tipo di froude, pero tambe labamentu di plaka ku a gana di forma kriminal. Ora ta trata di froude ta dañá e konfiansa entre e malechor i e víktima. Hopi biaha e kiebro di konfiansa ta sigui mas aleu i ta alkansá empresa òf institushonnan sosial ku tin komo meta protehá e siudadano.

Ora ta trata di la-

bamentu di plaka un víktima ta ménos komun, pero e konsekuensianan sigur no ta ménos tangibel. Por ehèmpel un persona ta kumpra propiedat pa hür, ku sèn ku el a gana di forma kriminal. Esaki ta limitá e chèns di hende komun ku ta buska un kas pa biba. Meskos ta konta pa invershon di plaka kriminal den bar i hotèl. E ora ei empresario legítimo tin un desbentaha di konkurensia kompará ku e negoshi di kriminal ku ta laba plaka.

E tim di FINEC di KPCN formativamente ta konsistí di dos reshèrshi finansiero fultaim. E tres añanan benidero kolegan di FIOD (Fiscale Inlichtingen en Opsporings-

dienst) i di Polis Nashonal di Hulanda Oropeo lo bin reforsá e tim aki tantu ku kapasidat di inteligensia komo kapasidat di trabou di reshèrshi. Ademas tin kolaborashon intensivo ta tumando lugá ku e ‘Financial Intelligence Unit’ (FIU) i e meta ta pa yega na un tim spesialisá, independiente i kompletu di FINEC den KPCN.

Si bo mes nota señal di kriminalidat finansiero ekonómiko, e ora ei por mèldu esaki, durante dia di trabou, via number di telefòn 715 8000 i puntra pa e departamento di FINEC. Tambe por mèldu via di nos liña di tep anónimo 9310 òf via meil na politie@politiecn.com.

OSOLEY optenibel na Boneiru

Aparato pa transformá aire den awa

KRALENDIJK— “Turkos a kuminsá 5 aña pasá. Na China mi a mira hendenan riba 100 ana. Ora mi a puntra kiko ta e sekreto, a resultá ku ta e awa ku nan ta bebe.” Alvin i Tirza Obersi den un entrevista resien a splika di nan produkto OSOLEY. E generadó ta produsí awa for di aire i tin hopi benefisio pa ser humano.

Alvin ta splika ku despues di su bishita na China el a profundisá su mes den e materia. Ora el a regresá Boneiru tabatin un kurso di Kanger Water. Impreshoná ku e presentashon, Alvin a disidí ku e ta kumpra dos pa tèt e produkto e mes. Kanger Water ta nifiká ‘bolbe na fuente’ na idioma haponés. Esaki ta nifiká awa den su forma mas puru.

Uzando e eksperensia di Kanger Water, Alvin a drenta den kontakto ku Christina Cavanna. Cavanna ta inisiadó di e



kompania OSOLEY. “Pa ta eksakto 20 aña pasá Cavanna a diseñá e aparato ku ta transformá aire den awa. Pero debí na krisis finansiero di e tempu ei no por a present’é na IPO. IPO ta para pa Initial Public Offering. Ta papia di e terminologia aki ora un empresa privá ta bende akshon pa promé biaha na públiko, e proseso aki ta konosí komo oferta públiko inisial (OPI).

OSOLEY

Frankisia di OSOLEY a kuminsá operá na St. Maarten i Guadalupe. Yunan di Cavanna huntu ku nan tata a orientá riba merkado di e dos islanan. Obersi: “A bende un total di 3 mil mashin entre e dos islanan. Aktualmente ainda nan tin e promé mashinan den uzo. Esei ta un indikashon ku ta trata aki di algu di kalidat.”

Despues di a hiba kombersashonnan nesarioso, a

yega na akuerdo ku Alvin i su tim lo sòru pa e produkto bai un nivel mundial. “Mi a konvensé nan ku e mihó kaminda pa ubiká e ofisina prinsipal ta na Boneiru. Motibu ta ku Boneiru ta un parti di Hulanda. Esaki ta enserá ku bo tin praktikamente embahada na bo disposishon ku por yuda drenta tur merkado na mundu,” Alvin ta splika.

Huntu ku nan

Entretantu e kompania a bira parti di mishon di awa di Hulanda. Den práktika ta nifiká ku unda ku Hulanda bai ku tin algu di aber ku awa, e invitashon ta bini na Boneiru pa Alvin i su tim forma parti di dje. “Nan ke nos huntu ku nan debí ku riba nan mes, nan no tin e solushon. Hulanda ta konosí i respetá den mundu pa solushoná problema di awa den hopi pais.” Alvin ta konsiente ku riba su mes e lo no por a yega riba merkado internashonal fásil. P’esei e ta enfatisá ku sigur ta benefisiá ku Boneiru ta forma parti di Hulanda.

Despues di famia Cavanna, Alvin i su tim ta e akshonista mas grandi di e kompania. Tambe nan tin e posishon di krea e merkado rònt mundu.

Generadó di awa

Mas aleu e komersiante ta indiká ku e siguiente guera lo ta pa motibu di awa. E ta amplia; “e

siguiente guera na mundu ta pa motibu di awa. Mundu ta bai konosé un skarsedat di kuminda. Motibu di esaki ta awa.

E generadó di awa ta traha riba airu. Tirza ta splika ku por personalisá e generadó segun nesidat di e kliente.” Loke e generadó di awa ta hasi ta réplika e proseso natural di awa. E ta chupa airu, purifiká esaki, i transform’é den awa. Durante e proseso tin lusnan un banda di e filter pa mata tur bakteria.” Mas aleu e ta indiká ku e generadó por produsí 10,30,60, 100i 500 liter di awa pa dia. Esaki segun e modèl di generadó ku skohe.

Distribushon

Boneiru ta e ofisina prinsipal ku ta sòru pa distribushon na entre otro Argentina, Fransia, Méhiko i tambe Panama. “Servisio ta na prome luga serka nos. Aktualmente na Colombia nos a traha riba e sentro di kliente promé ku a bai propagandá e produkto. Nos ke duna i soru pa e kliente risibi bon servisio. Awor ku esaki ta kla ta bai kuminsa ku merkadeo di e produkto.

Un i tur ku ke purba e awa por pasa libremente na ofisina di Obersi Group Kaya Grandi 72. Tirza i Alvin tei pa kualke pregunta i/of mas informashon. Djaweps 12’or di mèrdia, e programa ta pasa na Bonaire.tv i por mira e produkto den akshon.



Arctic Sunrise

KRALENDIJK— Barku di Greenpeace Arctic Sunrise ta na Boneiru 20 pa 27 aprel.

Diseñá pa kibra eis, Arctic Sunrise a nabegá den e laman mas friu na mundu.

Arctic Sunrise ta

forma parti di e flota di Greenpeace for di 1995. Su promé biahe tabata North Sea pa dokumentá kontaminashon Marino di petrolio di instalashonnan riba laman.

For di e tempu ei, el a sigui nabegá rònt mundu,

inkluyendo Kongo, Amazonas i mas resien den un ekspedishon di tres luna Na Antartika.

Tur esaki den kuadro pa hasi investigashon sientífiko riba biodiversidat den e region.



Ken por yuda

KRALENDIJK – Un biá mas sorpresa, un yu di kachó dilanti porta di kurá. Djaluna mainta durante trabou diario di personal di Fundashon Kunuku Kavelvers, a bati na porta ku e storia ku direpente tin un yu di kachó den un kaha na

porta serka un famia.

Mas aleu nada konosí i no tin mas informashon. I kon mester bisa nò na un yu di kachó inosente ku tin mester di yudansa.

Pues e yu di kachó a resultá na Kunuku Kavelvers. Ta buskando ku urgensia un

sitio temporal, òf permanente pa e kachó kaminda e por krese den tur tranki-

lidat.

E akohida ta yen i tin hopi preshon i esaki ap-

solutamente na ta e sitio ideal. Ken por yuda e yu di kachó?



Stanley Josepha a fayesé

KRALENDIJK – Stanley Crecencio Josepha a fayesé. El a nase na Kòrsou, bario West Groot St. Joris, dia 19 di aprel 1945, pero mayoria parti di su bida el a biba na Boneiru. Stanley a muri nèt un luna promé ku e a kumpli 78 aña di edat.

Stanley a nase i lanta den un famia di 11 ruman, 6 hòMBER i 5 muhé. Su tata tabata traha na Shell, su mama un ama di kas dediká na lanta i eduká su yunan. Un mama severo, pero ku amor pa tur su yunan.

Stanley den programa



Herensia: “Nos no tabata riku, tampoko pober. Pero fo’i mucha kaba nos mester a move, piki palu den mondi pa kushiná, limpia glas di lampinan di kerosin na kas, yuda ku otro trabou di kas.”

Despues di kita fo’i skol Stanley a bin haña trabou na e kontratista ANLO. “Mi tata a buska trabou pa mi. El a bisa ku tabata trabou pa drecha èrkondeshen, pero despues a resultá ku ta trabou pa traha

hèkwèrk, un trabou ku m’a gusta mes mes, ganando 75 florin pa siman.”

Un dia ANLO tabatin mester di trahadó na Boneiru i asina el a yega e isla ku despues a bira su kas pa semper. Pero promé ku el a establese definitivamente na Boneiru el a traha un par di tempu atrobe na Kòrsou i St. Maarten.

Stanley a tende ku AISCO, kompania di salu, tabata buskando trahadó. El a solisita i traha hopi aña na e kompania. Tabatin un interupshon, pero finalmente el a keda traha na e kompania aki te na

momentu ku el a baha ku penshun.

“No tabatin masha kos di hasi anochi. Traha den dia na Saliña i anochi bai sine. Na Teater Carib mi a topa ku Hendrica de Palm. E tabata bende karchi na lokèt di Carib. Nos a sera amistad ku otro, namorá otro, pa despues kasa”, Stanley a trese dilanti den Herensia. For di e matrimonio aki a nase dos yu: Roslyn i Lord. Mientrastantu Stanley a bira atventista. Hendrica a sigui despues. Huntu nan a biba nan fe hopi profundo den Iglesia Atventista.

Nos ke mondi

KRALENDIJK - Nashonnan Uní a proklamá 21 di mart komo Dia Internashonal di Mondí. Tema di e aña ta ‘Mondí i salubridat’. Mondí ta kontribuí hopi na salubridat. Nan ta purifiká awa, purifiká aire, nan ta saka karbon for di aire pa kombati kambio di klima i mehorá bienestar. Fuera di esei palu ta duna sombra i nan tin un influencia positivo riba klima lokal. Ta na humanidat pa protehé e rekursonan natural akí.

E lemanan “It’s in our nature” (TCB) i “Nos ta biba di naturalesa” ta bisa hopi di identidat di Boneiru.

Boneiru tin mondí tropikal seku i mondí di palu di mangel. Sientífikonan ta husga futuro di mondinan

tropikal seku komo masha desfavorabel. Esaki ta okashoná pa urbanisashon ku ta oumentando debí na kresementu di poblashon i di turismo. Kabritu, buriku i porko ku ta kome yerba tambe ta hunga un ròl importante. Afortunadamente ta tuma medida pa kombati deterioro. Un lugá lokal pa kultivo di palu, Tera Barra, ta kultivá pa e motibu ei míles di mata di Boneiru mes ku nan lo por planta despues na e isla. Na Washington-Slagbaai National Park, STINAPA tin un programa pa saka komedó di yerba afó.

Mondí di palu di mangel ta importante den e lucha kontra kambio di klima komo ku nan ta saka relativamente hopi CO2 for di

aire i ta protehé pais kontra tormenta tropikal. Pero mondinan di palu di mangel tambe ta bou di preshon ku konstrukshon kresiente, polushon, i eroshon komo konsekuensia di kabritu golos pa yerba. Stinapa i

Mangrove Maniacs ta purba kombati eroshon ku reforestashon. Nan ta mehorá sirkulashon di awa den mondí di palu di mangel ku hakmentu i kobamentu di kanal. Banda di kosta ta planta mondí di palu di

mangel nobo pa protekshon di kosta. Gobièrnu lokal i organisashonnan lokal ta bini ku e proyektonan i ta ehikutá nan. Reino ta paga pa ehekushon di e proyektonan. Mondí salú ta kontribuí na hende salú.



Di kon mester yega asina leu

Direktorado di R&O tin un seshon spesial pa atendé ku situashonnan ku meresé a-tenshon. Pero sí e seshon akí ta funshoná, no por bisa. Pasobra ta rònt e isla tin situashonnan prinsipalmente di bòrchi di nòmber di kaya i di tráfiko ku ta tapá bou di rama. Manera esnan riba e fotonan akí, bòrchi di nòmber di Kaya Gresia i tambe bòrchi di tráfiko na Gobernador Julio Abraham, tur tapa bou di rama.



DEN PASONAN DI BÒI

E rúbrika aki no ta kos di tur dia den BONERIANO. Ta ora mi tin tempu, gana i tópiko pa skirbi ariba e ta sali. E tres elementonan aki ta hunga un ròl den salimentu di e rúbrika aki. E ta mas tantu un kos pa tene mi okupá, pa no lubidá e arte di skirbimentu. Tene tambe e dedenan fleksibel. Tene e tinu bei, purba pa no kai den ritishon.

Un di e personanan ku a interesá mi mas tantu durante mi karera komo skirbidó di korant sin duda ta pastor Gilberto Alcívar, un persona ku sigur, durante su estadia na Boneiru, a lanta hopi stòf i a pèrkurá pa hopi notisia, riba un isla ku den e tempunan ei tabata relativamente ketu i trankil. Hopi tabata esnan ku di un òf otro forma tabata simpatisá ku su ideanan progresivo i revolushonario. Pero hopi hende tambe, partikularmente su superiornan, no tabata di akuerdo ku su aktitut, su deklarashonnan skèrpi i su manera di pensa.

For di dia ku pastor Alcívar a pisa tera boneriano el a sòru pa notisia. Su presensia riba e isla aki a pone ku hopi hende a bira mas konsiente. El a habri wowo di hopi hende pa su manera di pensa. Na un momentu

dado no tabata posibel mas pa el a keda Boneiru. E mester a bai. Tabatin un preshon enorme riba Obispo Ellis, tantu di parti pastornan hulandes oropeo, sierto parokianonan di Rincon i tambe gobemantenan di UPB i POB, pa tuma medida kontra Alcívar, pasobra el a habri su boka i protestá kontra entre otro estableimentu di un sentro di prostitushon na Boneiru.

Pakiko mi ta skirbi awe di pastor Alcívar? Simplemente pasobra no ta bayendo bon kuné na Ecuador, su pais natal. El a haña demensia. Despues di masoménos dos aña m'a tuma kontakto ku su famianan na Ecuador pa tende kon ta bai kuné. Dos aña pasá famianan a tuma kontakto ku mi i Jopi Abraham tokante Alcívar. Tantu Jopi ku mi tabata amigu personal di Alcívar. Mi a papia kòrtiku kuné. Su deseo tabata

pa bin Boneiru pa biba. Algu ku lógikamente no ta posibel, sigur mirando su kondishon. Segun su famianan, e tabata papia konstantemente di Boneiru i tabata menshoná nos nòmbernan, tambe algun otro persona ku a hunga un ròl importante den su tempu na Boneiru.

Último notisia ta ku a hinka e pastor den un 'asilo', un lugá spesial pa hendenan ku demensia. Michelle, un subrina di Alcívar, a informá mi esaki. El a duna mi number di selular di un ruman di Pastor, esta Remberto, ku mi ta bai yama e siman aki. Lo mi sigui informá boso.

Komo skirbidó di korant i amigu personal di Alcívar, mi tabata hopi enbolbi den e moveshonnan di e pastor aki durante su permanensia na Boneiru. Despues ku pastor Alcívar a bandoná Boneiru, mi a pone semper komo meta mi dilanti pa un dia skirbi un buki tokante e masoménos dos aña turbulento ku el a pasa na Boneiru. Esaki simplemente pasobra mi a kere ku generashonnan di futuro mester siña konosé kiko a pasa den 1977 pa 1979. Loke a pasa no por bai pèrdi. E susedonnan ei mester bira historia. I mi a logra publiká e buki aki tambe.

Hende ta bai i hende ta bini i ta bon pa esnan ku a nase despues di aña 1975 bini ariba, tambe esnan ku a bin biba riba e isla aki despues, haña sa kiko a pasa na Boneiru den e periodo ku Alcívar tabata na Boneiru. Loke mi a trata na hasi ta di warda tur e korantnan ku tabatin algu tokante pastor Alcívar den nan den e periodo ei. A base di e korantnan aki i otro dokumentonan mi a

trata na rekonstrui loke a sosodé.

Pastor Alcívar a bandoná Boneiru sin tuma despedida di e pueblo boneriano. Tres aña despues masoménos el a regresá Boneiru ku algun dia di fakansi. Tabata un Pastor Alcívar mas madurá, mas kouteloso, ku e pastor ku tabata riba e isla aki tres aña promé.





Pastor Gilberto Alcívar awendia ku 75 aña di edat

MONCHI & TONCHI

Pasku di Resurekshon ta yegando. Tempu pa buska webu!

Awèl sí. Pero kon ta bai buska loke no tin. Tin skarsedat di webu!



KOLOFÓN

Editor: Bonaire Communication Services N.V.
 Kaya Irlanda 12,
 Tel. 717-8482
Redakshon: extrabon@gmail.com
aviso: avisobon@gmail.com
Wèpsait: www.extraboneiru.com
Facebook: Extra Boneiru

Direktor
 Shirley Martis
 785-3824
 796-3824

Partner na Aruba
 Awe Mainta
Partner na Kòrsou
 Extra
Partner na Boneiru
 Live99

Redakshon
 Papi Antoin
 Nathaly
 Evertsz-Ipcedencia
 Davienuska Janga
 Velli Gijsbertha
 Edson Pietersz
 Ibi Piar (deporte)

Layout
 Davienuska Janga
 Maya Beaumont

Konsehero:
 Bòi Antoin
 786-6818
Aviso
 avisobon@gmail.com

Dòbel fam pa mucha

DEN HAAG – Dentro di poko mucha por haña fam di ámbos mayor. Despues di Tweede Kamer, Eerste Kamer tambe a bai di akuerdo ku e proposishon di lei di Minister Weerwind di derecho di protekshon i anteriormente su antesor Dekker, pa kua por laga e eskoho na e mayornan.

Base di e lei ta ku dos fam e konekshon di e mucha ku ámbos mayor, por yega na ekspreshon. Ma-

yornan por duna nan promé yu den e familia dòbel fam. E eskoho ta konta tambe pa e eventual siguiente yunan.

Anteriormente e lei tabata solamente intenshoná pa beibinan ku a kaba di nase, pero Weerwind a kambia e reglanan pa asina tur mucha ku desde promé di yanüari 2016 a nase, por kai bou di dje.

Mayornan ku ainda ke adaptá fam pa e muchanan akí, desde introdukshon di

e lei dia promé di yanüari 2024, tin un aña di tempu pa regla esaki.

Sí mayornan skohe pa ámbos fam, esaki ta keda skirbí sin strep, pues por ehèmpel De Jong Van Vliet. Dòbel fam no ta obligatorio. Meskos ku Tweede Kamer, Eerste Kamer tambe a vota den su mayoria pa e lei. Bou di esnan ku a vota kontra tabatin tambe partido di gobernashon, CDA.



Pa ámtenarnan di Reino

Gabinete ta prohibí TikTok riba telefòn di trabou

DEN HAAG – Dentro di poko, ámtenarnan di Reino no por tin TikTok

mas riba nan telefòn di trabou. Esaki Sekretario di Estado, Alexandra van

Huffelen, ta skirbi den un karta pa Tweede Kamer. Di inmediato ta prohibí e

uso.

Riba término kòrtiku ta programá e telefònnan ku e ámtenarnan ta haña di Gobièrnu di tal manera, ku por instalá solamente app-nan ku ta permisibel, no ta permití pues app-nan di spionahe.

Un bosero a konfirmá ku esaki tin di aber ku TikTok, un app di e empresa chines Bytedance.

Tin un total di 140 mil ámtenar di Reino. Kuantu ámtenar tin telefòn di Gobièrnu, no ta konosí.

Ku esaki Gabinete ta sigui e konseho di e servisio di intelighensia, AIVD. Den e konseho tin pará ku pa tur app den maneho di paisnan ku un programa sibértiko ofensivo, dirigí kontra Hulanda i interesnan hulandes, tin mension di un rísiko di spionahe grandi.


Ounke ku no ta men-

shoná e pais na nòmber, China ta un di e paisnan ku ta konta pa esaki. Otro paisnan ku ta mensioná dor di AIVD, ta Rusia, Iran i Nort Korea.

Ku esaki e reglanan no ta konta pues pa otro media sosial konosí manera Instagram i Facebook, ku ta merikano.

Den un reakshon riba e desishon, e empresa ta laga sa: “Ningun estado òf gobièrnu ta kontrolá TikTok. Tantu TikTok komo nos empresa madre no ta propiedat chines i gobièrnu chines no tin ningun aksesu na informashon di usuario di TikTok.”

Ku esaki Hulanda ta sigui otro paisnan europeo ku e anunsiá medida kontra TikTok. Anteriormente e luna akí, Reino Uní i Bèlgika a anunsiá un prohibishon.



Polis heridá durante detenshon

BRABANT – Un agente polisial djaluna anochi a resultá heridá, durante detenshon di un hóben di 17 aña riba Hogebergdreef na Putte, Noord-Brabant. Durante e detenshon, e agente a hasi uso di arma di dal

koriente, pasobra e hóben a resistí.

Den kareda di kuartu pasá di shete, un agente polisial a topa ku e dos hóbennan, di kua unu ta konosí komo bendedó di droga. E no tabatin nada huntu kuné.

Djis un ratu despues e agente a habri e otro hóben su yas kaminda e agente a mira ku probablemente tabatin droga den dje.

E hóben a resistí kontra su detenshon. Durante forsageo, e agente a resultá heridá na su man, dor di kua e mester a bai hospital mas despues. E agente a hasi uso di un arma di dal koriente pa detené e hóben.

E hóben tabatin un saku ku probablemente droga aden i a benta esaki afó. E agente no por a haña e saku mas. Ainda e hóben ta detené pa resistensia.



BONAIRE MARMER N.V.

ta buska

- 3 metaalbewerker

-mester por papia papiamentu/portuges i spañó

Inf. tel. nr **785-7491** persona di

kontakto Jorge Goncalves Ferreira

KÒRSOU

Un bia mas

Sargassum ta kousando bastante molèster

WILLEMSTAD — Kòrsou atrobe ta den e temporada ku kantidat grandi di Sargassum ta drif yega kosta. For di dos siman pasá Ministerio di GMN a risibí notifikashon kaba ku tin kantidat grandi di Sargassum den laman ta biniendo den direkshon di Kòrsou. Maneho di Medio Ambiente i Naturalesa ya a inisiá inventarisashon di e daño na e áreanan mas afektá kual ta Sint Joris i Ascencion. E departamento lo sigui monitoriá e situashon e dianan aki pa despues di inventarisashon plania un

momento ku ta mas efikas i efisiente pa atendé ku e Sargassum.

Sargassum ta un tipo di alga di laman Atlántiko ku semper ta drif liber riba laman. Ounke hende ta eksperensiá molèster momentu ku sargassum ta riba tera, e tin un funshon importante den ekosistema marino. E ta forma refugio pa hopi sorto migratorio i ta habitat pa mas ku 120 sorto di piská i hopi sorto di espesie. Pa sierto espesie den peliger di ekstenshon manera turtuga tambe Sargassum ta forma habitat,

refugio i kuminda. Meskos ta konta pa sierto tipo di piská komersialmente importante manera tuna. Komo alga marino Sargassum ta faktor importante tambe den produkshon di oksígeno.

Apesar di e funshon fundamental di Sargassum den ekologia mundial, un-abes riba tera i den kantidat grandi e ta forma molèster pa hende den forma di holó stinki. Alabes, momentu ku Sargassum drenta un di e bokanan e ta yena esaki di tal manera ku e ta forma peliger pa entre otro turtu-

ganan. Nan ta keda pegá den e Sargassum bou di awa i no por bini ariba pa hala rosea.

Riba potrètnan por mira e situashon aktual na Sint Joris i Ascencion.



Dos detenshon pa ladronisia

WILLEMSTAD — Polis despues di a haña notifikashon, mester a bai Watamula pa un kaso di ladronisia. Esaki riba djaluna den oranan di mèrdia.

For di e investigashon preliminar a sali na kla ku dos sospechoso den un vehíkulo mester a kibra den un vehíkulo di un famia turista i hòrta pertenensia for di e vehíkulo.

Despues di un búskeda polis a señalá e vehíkulo

ku e sospechosonan na altura di Groteberg. Na e sitio a detené e sospechosonan i a konfiská e pertenensianan prosedente di ladronisia.

Ta trata di C.J.M., nasé na Kòrsou di 22 aña di edat i U.F.M., nasé na Kòrsou di 38 aña di edat.

A presentá e sospechosonan dilanti un fiskal ouksiliar ku despues di interrogashon a ordená nan enkarselamentu pendiente di mas investigashon.

Min.Cooper a entregá pèrmit na Bayside Development

WILLEMSTAD — Minister Charles Cooper huntu ku Servisio pa Planifikashon Urbano (ROP) a hasi entrega di un pèrmit di konstrukshon na Bayside Development B.V.. Esaki ta pa konstrukshon un apartèment/hotèl komo parti di e proyekto titulá 'Epic at the Bay' na Piscaderabaai.

E apartemènt/hotèl aki lo konsistí di 44 unidat di bibienda kompañá pa 44 lugá di parker. Esaki lo rekerí un invershon mínimo di 22 mion florin.

Trabounan ta tuma lugá den diferente fase. E pèrmit di konstrukshon duná

riba 20 di mart pa konstrukshon di e 44 unidatnan lo ta e promé fase di e proyekto 'Epic at the Bay'. Di dos fase lo enserá konstrukshon di 8 vila aserka, pa despues sigui ku e di tres fase di 100 unidat di apartemènt/hotèl adishonal. E último fase ta e 'Epic Village'. Tur esaki total lo ta un invershon di un promedio di 130 mion florin.

E konstrukshonnan aki ta kontribuí komo un impulso ekonómiko grandi pa Kòrsou atraves di kuponan di trabou na momento di e konstrukshon, i durante di e fase di mantenshon.



ARUBA

Chauffeur burachi deteni dilanti Imelda Hof

ORANJESTAD -- Dia-domingo anochi den careda di 11'or polis a wordo informa cu un auto lo a pasa ariba e rotonde di Noord. Patruxa di Noord mesora a bay tira bista y bayendo e



sitio nan a topa cu e auto dilanti Imelda Hof, y ainda cu un pida mata grandi pega bou di dje.

Agentenan mesora a constata cu e chauffeur ta burachi y a pidi pa un trans-

portwagen y trafico. Na yegada di transportwagen

e la wordo hiba warda di Shaba.

Takelwagen a wordo pidi pa bay cu e auto.



Premier Evelyn Wever-Croes:

Conferencia di awa na Nacionnan Uni

ORANJESTAD - Durante Conferencia di Gobierno, Prome Minister Evelyn Wever-Croes a informa cu e siman aki lo atende e conferencia "Un 2023 Water Conference" cu lo tuma luga na New York. Un tema relevante cual Prome Min-

ister lo ta atende conhuntamente cu Minister Ursell Arends di 22 pa 24 di maart, pa trata entre otro desaroyonan di awa mundialmente y nan efecto riba Aruba.

Nivel di awa mundialmente ta aumentando cual ta pone reto grandi pa isla-

nan rond mundo y Aruba no ta excepcion. Prome Minister Wever-Croes, durante di conferencia di gobierno a splica cu ta trahando riba un mapa climatologico di Aruba caminda cu ta indica si nivel di awa subi, cua ta e partinan na Aruba cu ta cuminsa bay bou awa. Esaki ta un problema cu ta exige compromiso di henter mundo pa solucion.

Prome Minister Wever-Croes a splica cu tur e islanan cu ta parti di Reino Hulandes ta riba nivel di awa, pero si nivel di awa keda subi, e lo causa problemanan cu consecucionnan severo. Mescos cu awa

ta duna bida, awa ta kita bida tambe. Pesey e ta hopi importante pa tuma accion y pa mundo henter tuma accion y muestra e compromiso. Basa ariba esaki, Reino Hulandes ta organisa e conferencia di awa na Nacionnan Uni e siman aki.

Gobierno di Aruba a ricibi e invitacion di Gobierno di Hulanda pa participa na e nivel di mas halto cu ta posibel. Consecuentemente mirando cu ta Rey Willem Alexander ta guia e conferencia aki, a acepta e invitacion y Prome Minister Ursell Arends, lo atende e conferencia.

Minister Arends tin e cartera di Naturalesa bou su encargo y Prome Minister tin aspectonan infrastructural y adaptacion cu mester tuma luga pa motibo di cambio di clima den su ministerio. Apart di esey, Prome Minister Wever-Croes tin e rol pa reemplasa Rey Willem Alexander cu ta e presidente di e conferencia ora cu e no por ta presente, durante e 3 dianan aki y guia e reunionnan den su nomber. Ademas, tanto Minister Arends y Prome Minister Wever-Croes, lo ta orador na diferente ocasion durante e conferencia.



A los tiro pa boto cu ilegalnan

ORANJESTAD -- Diadomingo den oranan di anochi Kustwacht y KPA ta detecta un boto drentando awanan territorial di Aruba. Den cuadro di bon cooperacion y cu bon coordinacion KPA y Kustwacht a logra intercepta e boto cu tawata

bin for di direccion di Venezuela cu intencion pa drenta Aruba. Pa alogra stop e boto personal di Wardacosta un biaha mas mester a los algun tiro di advertencia. Abordo di e boto tawata tin 5 hende homber di nacionalidad venezolano. E capitán di

e boto a ser entrega na e rechenan di Unit Ge-

organiseerde Criminaliteit. E caso ta den pleno

desaroyo y e investigacion lo sigui su curso.



STATIA/SABA/ST. MAARTEN

Gobièrnu no tin un bista

Presensia i kresementu desordená sektor di loteria

PHILIPSBURG -- Gobièrnu di St. Maarten no tin un bista ètòl di e sektor di loteria riba e isla. Esaki por konkluí for di e rapòrt di Konseho Sosial Ekonómiko, SER, ku a hasi un investigashon riba e impakto sosial-ekonómiko di e lugánan di benta di number den e áreanan ku entrada abou. Shete organisashon ku pèrmit di bende number na St. Maarten, ta doño di mas o ménos 360 kantor di benta di number. Esaki ta kalkulá na 2 kantor di number pa kilometer kuadrá. Ministerio di Turismo, Asuntunan Ekonómiko, Transporte i Telekomunikashon, ta en-

kargá ku dokumentashon di tur lugá di benta di number na St. Maarten, pero for di e investigashon di SER ta sali na kla ku esnan ku tin pèrmit di benta di number no ta informá e ministerio tokante lokalidatnan nobo. Pa tal rason e kantidat real di e kantornan di number por ta muchu mas haltu, segun SER.

Mas aleu SER ta trese dilanti ku por papia di un realidat no reglamentá di e kantornan di number, kaminda no tin restriksion riba e kantidat di punto di benta ku un tenedó di pèrmit mag tin.

Tres biá mas tantu



Awor ta resultá ku tin tres biá mas tantu kantor di number registrá pa kilometer kuadrá, kompará ku e kantidat permití riba otro islanan, manera na Kòrsou.

Ademas e ministerio ta duna pèrmit di bende number pa tempu indefiní, en bes di tempu definí di 5 aña, manera ta poné den e ordenansa di loteria.

E legislashon aktual segun SER, no konosé ningun forma di responsabilidat sosial, òf deber di esun ku tin e pèrmit pa aktivamente prevení, òf frena adikshon di hunga plaka na St. Maarten.

For di un estudio di Gambling Research Exchange di 2017, ya a sali na kla ku tin un prevalensia mas haltu pa hunga plaka bou di e gruponan di poblashon ku ta biba den pobresa, ku bou di e poblashon general.

Mantenshon i kumplimentu

SER ta konsehá gobièrnu unánimemente pa aselerá mantenshon i kumplimentu i adaptá e desishon di pèrmit di loteria pa específikamente pèrkurá pa un

bon regulashon di loterianan i nan puntonan di benta, bou di kua restriksion di e kantidat di punto di benta i rebendedó pa kada tenedó di pèrmit. Mas aleu, e konseho ta rekomendá but ora ku no kumpli, den kombinashon ku un oumento di e kastigu máksimo di 5 mil florin i ekspanshon di 'due diligence' na momentu di forsa kumplimentu di leinan aplikabel.

Den kaso ku gobièrnu skohe pa implementashon di un Gaming Control Board, mester hasi posibel ku e entidat akí por investigá maneranan alternativo pa eksigí kumplimentu dentro di e industria di hungamentu di plaka.

Tambe SER ta rekomendá un enmienda pa duna e minister e posibilidat pa pidi tur e doñonan di pèrmit plaka pa via gobièrnu, òf un otro entidat gubernamental kontribuí na un interes sosial ku tin relashon ku adikshon di hunga plaka i prevenshon di esaki.

Tambe SER ta rekomendá pa ouditá tur doño di pèrmit di kantor di number pa haña un bista amplio den

e totalidat di e industria di kantornan di number na St. Maarten.

Adikshon

SER ta trese dilanti ku for di 1995 no tin informashon ku por uza tokante e magnitud di adikshon na wega di plaka na St. Maarten. Pa lei gobièrnu di St. Maarten ta obligá pa tuma e medidanan nesesarario pa ofresé kuido adekuá na personanan ku ta sufri di afekshon síkiko, manera adikshon na wega di plaka, segun e rapòrt.

Mester limitá e kantidat di kantor di number i rebendedó den barionan ku entradanan abou, segun konseho di SER.

Puntonan di benta di loteria no tin mag di ta dentro di un stral di shen meter di skol, hospital, klínika, misa, banko i sentronan di revalidashon.

SER ta konsehá tambe pa prohibí doñonan di pèrmit pa bende loteria na personanan delikado, entre kua posibel personanan ku ta sufri un adikshon serio na wega di plaka.

Saba na kompetensia 'World Skills Talents'

THE BOTTOM – Dos studiante di Comprehensive School (SCS) a biaha pa Hulanda e fin di siman ku a pasa, pa partisipá na e kompetensia 'World Skills Talents'.

Djaweps 23 di mart, e studiantenan Anthonio Suares i Dillon Diaz, ta kompetí den e área di karpinteria di e kompetensia ku ta tuma lugá na RAI Amsterdam.

Nan ta partisipá huntuku mas di shen finalista ku a tuma parti den e diferente

kompetensianan den área di abilidadat na RAI, un evento hopi grandi.

Na yanüari e aña akí dos tim di SCS di klas nivel 4 i 5 di konstrukshon general, a kompetí na 'SSS SKILLS', na St. Maarten. Un tim, konsistiendo di

Suares i Diaz, a gana e promé premio den e kompetensia di karpinteria na St. Maarten.

Despues e tempu ei, e skol a bin ta okupá organisando pa e dos studiantenan biaha pa Hulanda pa kom-

petí den 'World Skills Talents - Skills the Finals'.

E tim di Saba ta inkluí tambe dos coach. "Esaki ta un oportunitat ekselente pa e studiantenan pa kompetí i generá eksperensia na e nivel akí di e kompetensia," gerente di e skol a bisa.

E tim di Saba a biaha djadumingu pa Hulanda. Na Hulanda e tim ta partisipá tambe na aktividatnan edukashonal relatá den área di karpinteria i konstrukshon.



Xaquenne Saragoza ta alkansá final torneo di tènis

KRALENDIJK – E úniko partisipante di Bonaire na e torneo di tènis anual ProKids di Curaçao Sports Center (CSC) na Kòrsou, Xaquenne Saragoza di 11 aña, djadumingu a alkansá e final.

Despues di e fase di pul i semi final, finalmente Xaquenne a pèrdè den dos

sèt e pelea final for di Candice Curie di 12 aña di Kòrsou. El a finalisá ku un trofeo di plata.

E torneo Prokids ta e evento di hubentut di mas grandi den tènis na Kòrsou. E aña akí un 50 mucha muhé i mucha hòmer asina, plamá riba diferente kategoria, a partisipá.



DEPORTE

BJSC ku ‘train the trainer’.

KRALENDIJK- Bonaire Jeugdschaakclub (BJSC) a organisá un workshop di ‘train the trainer’. Nan a hasi esaki pa ta prepará pa futuro, pa yuda guia e hóbennan na klup. Ya nan ta hasiendo esaki pero ku un training di dos dia ku Henk van den Bos tur e partisipantenan a risibí informashon pa por analisá i evaluá e wegá.

Awor nan ta bai pa un nivel mas haltu i mas profeshonal. E meta ta kalidat riba kantidat. Nan meta ta

pa e hóbennan presta bon den torneo internashonal i lokal.

Henk van den Bos a duna diferente konseho pa e hóbennan por traha riba dje.

Nan ta gradisí Indebon, Gobièrno di Boneiru, Liseo Boneriano i tur e mayónan ku a koperá òf yuda den e proyekto. E kurso tabata un éksito i despues nan a tene un rekorido ku Henk pa must’é e parti nort di Boneiru i nan ta kere ku pronto e lo ta bèk pa duna

mas training.

B JSC a kuminsá komo SGB-schaakclub i a transformá e klup den Bonaire Jeugdschaakclub ku a habri pa hóbennan di tur skol.

A kuminsá duna lès di dam i ahedres pa yuda e hóbennan pensa den materianan di matemátika i fisika.

Despues di 35 aña e mayoria di e hóbennan ta di enseñansa primario.

E lèsnan awendia ta na Liseo Boneriano riba djabièrnè.



Primary Care Caribbean akreditá

KRALENDIJK -- Resientemente ocho trahadó ku ta ehersé e bunita trabou di triagista na Primary Care Caribbean, a sigui un kurso di servisio na kliente. Esaki tabata na enkargo di Denise de Jongh-Rekwest di Train-

ing & Consultancy 2000.

Un triagista ta un persona ku ta traha na un pòst di dòkter di kas i ta e promé persona ku un pashènt ta papia kuné.

E triagista ta evaluá i disidí e urgensia di tratamen-

tu. Nan por duna konseho independiente i regla un konsulta ku dòkter di kas. Pa por bira un triagista, ta rekerí di tin un mínimo estudio di asistente di dòkter òf enfermera.

E kursistanan a haña

diferente hèrmènt pa asina por hasi nan trabou mas fásil ora di atendé ku nan pashènt. Entre otro kon pa dil ku situashon difisil ora un pashènt malu aserká nan, kon pa komuniká na un manera efektivo, kon pa

skucha aktivo.

Na final di e kurso, e triagistanan a keda hopi satisfecho mirando ku nan siña kon pa atendé ku nan pashènt riba un manera mas efektivo, profeshonal i ku étika.

Pa registrashon di nobo, e triagista mester renobá su diploma kada 5 aña i un di e eksigensianan ta ku e re-educashon mester ta akreditá.

Primary Care Caribbean tin e plaser di informá ku e kurso di servisio na kliente ku e kompania Training & Consultancy 2000 a duna resientemente, a keda akreditá pa Van Campen Consulting na Hulanda.

Primary Care Caribbean ta felisitá Denise de Jongh ku e gran logro akí.

Na final tur 8 triagista a risibí nan sertifikado bon meresí. Nan ta motivá i ansioso pa sigui mas treinen.



E kursistanan huntu ku nan trainer na ora di entrega di sertifikado.

30 30

YEARS PRIZES

City Shop ta hasi aña y nos lo selebrá na **GRANDI!**

30 AÑA - 30 PREMIO



1. Hasi un kompra di \$50 bai ariba.
2. Scan e kódigo QR aki ku bo telefòn.
3. Yena e formulario.

Bo ta partisipando!

Bishita nos página di Facebook i haña mas informashon tokante e konkurso aki.



1st Prize: A Changan CS15 2023!



City Shop
Smart shopping • Better living

30
ANIVERSARIO

f /CityShopBonaire